



МОНГОЛ УЛС  
САНХҮҮГИЙН ЗОХИЦУУЛАХ ХОРООНЫ  
ТОГТООЛ

2014 оны 08 сарын 24 өдөр

Дугаар 303

Улаанбаатар хот

Хорооны 2013 оны 198 дугаар тогтоолоор  
батлагдсан журамд нэмэлт оруулах тухай

Санхүүгийн зохицуулах хорооны эрх зүйн байдлын тухай хуулийн 6.1.2, 6.2.3, Даатгалын тухай хуулийн 13.1.3 дахь заалтыг тус тус үндэслэн Санхүүгийн зохицуулах хорооноос ТОГТООХ нь:

1. Санхүүгийн зохицуулах хорооны 2013 оны 5 дугаар сарын 22-ны өдрийн 198 дугаар тогтоолоор батлагдсан “Даатгагчийн үйл ажиллагаанд тавигдах шаардлага, дагаж мөрдөх үзүүлэлтийг тодорхойлох журам”-ын 2 дугаар зүйлийн 2.1 дэх хэсэгт болон 3 дугаар зүйлд доор дурьдсан агуулгатай 2.1.4 дэх заалт, 3.2, 3.3, 3.4, 3.5, 3.6, 3.7, 3.8, 3.9, 3.10 дахь хэсгийг тус тус нэмсүгэй:

**1/ 2 дугаар зүйлийн 2.1 дэх хэсгийн 2.1.4 дэх заалт:**

“2.1.4. “хүртээмжтэй даатгал” гэж иргэн бүрийг хамруулах зорилго бүхий, даатгалын гэрээний үг хэллэг нөхцөл нь энгийн ойлгомжтой, даатгалын хураамжийн хэмжээ болон нөхөн төлбөрийн хасалт бага байх сайн дурын даатгалын бүтээгдэхүүнийг ойлгоно.”.

**2/ 3 дугаар зүйлийн 3.2, 3.3, 3.4, 3.5, 3.6, 3.7, 3.8, 3.9, 3.10 дахь хэсгүүд:**

“3.2. Даатгагч даатгалын бүтээгдэхүүнийг зах зээл дээр борлуулахаас өмнө дараах баримт бичгийг бүрдүүлж, Хороонд бүртгүүлнэ:

3.2.1. Энэхүү журмын 1 дүгээр хавсралтын дагуу гаргасан даатгалын бүтээгдэхүүнийг бүртгүүлэх хүсэлт;

3.2.2. Иргэний хуулийн 431.4 дэх хэсэгт заасан нөхцөлийг тусгасан даатгалын бүтээгдэхүүний гэрээний загвар;

3.2.3. Даатгалын бүтээгдэхүүний баталгааны загвар;

3.2.4. Даатгалын бүтээгдэхүүний танилцуулга болон даатгалын хураамжийн тооцоолол, танилцуулга /даатгалын хураамжийн тооцооллыг зээлийн гэрээний хугацааны туршид хураамжийг нэг удаа эсхүл сар улирал, хагас жилээр төлөгдөхөөр тооцсон байх, барьцаа хөрөнгийн хувьд байгалийн эрсдэл, галын эрсдэл гэх мэт эрсдэлүүдийг нарийн тооцсон байх, амь насны даатгалын хувьд нас баралтын хүснэгт, хүүгийн хүчин зүйлийн тооцооллыг тусад нь хавсаргана/.

000332

3.3. Орон сууцны урт хугацааны зээлийн даатгалын бүтээгдэхүүнийг бүртгэхэд Хороо дараах шаардлагыг тавина:

3.3.1. Ердийн даатгалын үйл ажиллагаа эрхлэх тусгай зөвшөөрөл авсан даатгагч “Орон сууцны зээлийн барьцаа хөрөнгийн даатгалын гэрээ”-г борлуулахад, Урт хугацааны даатгалын үйл ажиллагаа эрхлэх тусгай зөвшөөрөл авсан даатгагч “Орон сууцны зээлдэгчийн амь насны даатгалын гэрээ”-г борлуулахад энэ нэр томъёоноос өөрөөр нэрлэхийг хориглох бөгөөд эдгээр бүтээгдэхүүнийг багцалж борлуулах нөхцөлд “Орон сууцны зээлийн даатгалын гэрээ” гэж томъёолох;

3.3.2. Даатгагч орон сууцны урт хугацааны зээлийн даатгалын бүтээгдэхүүнийг даатгахдаа Монголбанкнаас баталсан ипотек (моргэйж)-ийн зээлийн холбогдох журамд заасан зээл авах шаардлагыг хангаагүй зээл хүсэгчийг даатгахгүй байх;

3.3.3. Зээлдэгчийн амь насны даатгалын гэрээний хугацаа нь зээлийн гэрээний хугацаанаас багагүй байх;

3.3.4. Зээлдэгчийн амь насны даатгалын хувьд даатгагч урт хугацааны нөөц байгуулах;

3.3.5. Даатгагч нь банкны орон сууцны зээлийн нөхцөл, шаардлагад өөрчлөлт орсон эсэхийг судалсан байх;

3.3.6. Орон сууцны урт хугацааны зээл (моргэйж, ипотек)-ийн хөрөнгийн даатгалын бүтээгдэхүүнийг борлуулахдаа эрсдэлийг тараах зорилгоор нэг байршилд буй хөрөнгийн зах зээлийн үнэлгээ нь тухайн даатгагчийн нөөцийн сангийн хөрөнгөөс давсан тохиолдолд нэг даатгагч дангаараа даатгахыг хориглоно;

3.4. Хурдан морины уралдаанч хүүхдийн гэнэтийн ослын даатгалын бүтээгдэхүүнийг бүртгэхэд Хороо дараах шаардлагыг тавина:

3.4.1. Даатгалын эрсдэлд үндэсний баяр наадам болон бүх түвшний хурдан морины уралдаан, түүний бэлтгэл, сунгааны үед үүсч болзошгүй бүхий л гэнэтийн осол, гэмтэл болон даатгалын гэрээний хугацаанд бий болж болзошгүй бусад ахуйн гэмтэл, ослыг тусгах.

3.5. Хүртээмжтэй даатгалын бүтээгдэхүүнийг бүртгэхэд Хороо дараах шаардлагыг тавина:

3.5.1. Даатгалын хураамж болон эрсдэлийн хэмжээ нь бага, дунд орлоготой иргэдэд зориулагдсан байх;

3.5.2. Даатгалын гэрээнд тусгасан нөхөн төлбөрийн хасалтын тоо 5-аас ихгүй байх;

3.5.3. Даатгалын гэрээ нь хоёрдмол утга санаагүй, бусдад шууд ойлгохоор үг, хэллэгтэй байх;

3.5.4. Даатгалын нөхөн төлбөрийг 10 хоногт олгодог байх; /даатгалын зуучлагч болон хуулийн этгээд даатгалын төлөөлөгчөөр дамжуулан даатгалын нөхөн төлбөрийг олгох боломжтой/;

3.6. Энэ журмын 3.5 дахь хэсэгт заасан хүртээмжтэй даатгалын бүтээгдэхүүнийг Хороо бүртгэхдээ код өгөх бөгөөд уг код нь “ХД” үсгийн ард дугаар, оныг илэрхийлсэн цифрийг

тусгана. /Тухайлбал: ХД00012014 гэснийг 2014 оны 1 дугаартай хүртээмжтэй даатгалын бүтээгдэхүүн гэж ойлгох/.

3.7. Тээврийн хэрэгслийн даатгалын бүтээгдэхүүнийг бүртгэхэд Хороо дараах шаардлагыг тавина:

3.7.1. Тээврийн хэрэгслийн даатгалын бүтээгдэхүүний гэрээнд тээврийн хэрэгслийн үзлэг оношлогоонд ороогүй тээврийн хэрэгсэлд нөхөн төлбөр олгохгүй байх болон богино холболтын улмаас галд шатах мөн замын хөдөлгөөний дүрэм зөрчсөн, техникийн шаардлага хангаагүй зэрэг ерөнхий заалтыг тусган даатгуулагчид нөхөн төлбөр олгохоос татгалзах заалтыг даатгалын гэрээнд тусгахыг хориглоно.

3.8. Даатгагч Хороонд бүртгүүлсэн даатгалын гэрээний загвараас өөр нөхцөл шаардлага бүхий загвараар тухайн бүтээгдэхүүнийг зах зээлд борлуулах, мөн даатгагчийн төлөөлөн удирдах зөвлөлөөс бусад эрх бүхий албан тушаалтан нь өөр даатгагчийн эрх бүхий албан тушаалтнаар ажиллахыг хориглоно.

3.9. Хороо даатгалын бүтээгдэхүүнийг бүртгэх эсэхийг ажлын 5 өдрийн дотор шийдвэрлэх бөгөөд бүртгэхээс татгалзсан тохиолдолд энэ талаар даатгагчид албан бичгээр хариу өгнө.

3.10. Хорооны Даатгалын газар даатгалын бүтээгдэхүүний бүртгэлийг файлаар бүртгэх бөгөөд бүртгэлд орсон өөрчлөлтийг ажлын 2 өдрийн дотор хийнэ.”.

2. Гаргасан даатгалын бүтээгдэхүүнүүдээ 2015 оны 01 дүгээр сарын 01-ний өдрөөс өмнө энэхүү нэмэлтийн хүрээнд нийцүүлэн Хороонд бүртгүүлэхийг даатгалын компаниудад үүрэг болгосугай.

3. Энэхүү нэмэлтийг хүчинтэй байгаа даатгалын гэрээг сунгах, мөн шинээр даатгалын гэрээ байгуулахад мөрдлөг болгоно.

4. Батлагдсан нэмэлтийг журамд оруулж, хэрэгжилтэд хяналт тавьж, олон нийтэд мэдээлэхийг Ажлын алба /Х.Бум-Эрдэнэ/-нд даалгасугай.

ДАРГА



Д.БАЯРСАЙХАН

Даатгагчийн үйл ажиллагаанд тавигдах шаардлага, дагаж мөрдөх үзүүлэлтийг тодорхойлох журам"-ын 1 дүгээр хавсралт

ДААТГАЛЫН БҮТЭЭГДЭХҮҮНИЙГ БҮРТГҮҮЛЭХ  
ХҮСЭЛТ

Огноо:.....

Хаана: Санхүүгийн зохицуулах хороо,

Засгийн газрын 4-р байр, Бага тойруу-6, Улаанбаатар-46, Монгол Улс

Даатгагч.....ХХК нь Даатгалын тухай хууль болон холбогдох хууль тогтоомжид нийцүүлэн даатгалын бүтээгдэхүүнийг бүртгүүлэх хүсэлтэй тул дараах баримт бичгийг үнэн зөв бүрдүүлж хүргүүлсэн болно:

1. даатгалын бүтээгдэхүүний гэрээний загвар;
2. даатгалын бүтээгдэхүүний баталгааны загвар;
3. даатгалын хураамжийн тооцоолол, танилцуулга;

Бүрдүүлсэн баримт бичигт ямар нэг худал ташаа зүйл орсон бол хариуцлагыг манай компани хүлээх болно.

Тус компанийн хүсэлтийг хүлээн авч, хянан шийдвэрлэж, ..... даатгалын бүтээгдэхүүнийг бүртгэж өгнө үү.

Хүсэлт гаргагчийг төлөөлж:

.....ХХК-ийн гүйцэтгэх захирал:

.....  
(гарын үсэг)(овог, нэр)

.....  
(тамга тэмдэг)

САНХҮҮГИЙН  
ЗОХИЦУУЛАХ  
ХОРОО  
УЛААНБААТАР-46